

Aningaasaqarnermut Ataatsimiititaliap suliaq nr. 01.31.06/08-00308 pillugu ulloq 11. januar 2008-mi aalajangiinera pillugu Naalakkersuisunut ilisimatitsineq.

(Naalakkersuisut siulittaasuata ulloq 27. december 2007-imi aalajangiinerani nr. 256)

Nunaqarfinni tunisassiorfiit pillugit kiffartuussinissamik isumaqatigiissutip akuerineqarnissaa

Naalakkersuisut **inassutigaat**,

- Namminersornerullutik Oqartussat aamma Arctic Green Food A/S-ip akornanni kiffartuussinissamik isumaqatigiissut saqqummiunneqarneratut iluseqartillugu Aningaasaqarnermut Ataatsimiititaliamit akuerineqassasoq
- Tamatuma kingorna Inatsisartut Inuussutissarsiornermut Ataatsimiititaliaat isumaqatigiissutip assilineranik nassiussinikkut ilisimatineqassasoq
- Tamatuma kingorna unammilleqatigiinneq pillugu inatsimmi malittarisassat malillugit isumaqatigiissut Unammilleqatigiinnermut Ataatsimiititaliamut nalunaarutigineqassasoq.

Aningaasaqarnermut Ataatsimiititaliap oqaaseqaatai

Ukiunut 2008-2011-mut Arctic Green Food A/S-imut (AGF) kiffartuussinissaq pillugu isumaqatigiissutissap nutaap Aningaasaqarnermut Ataatsimiititaliamit siumoortumik akuersissutigineqarnissaa Naalakkersuisut suliami matumani qinnutigaat. Suliffeqarfimmu 2008-mi 18,7 mio.-inik tapiissuteqarnissaaq Naalakkersuisut siunnersuutigaat, tapiissutit 2011-mi 14,4 mio. kr.-inngorlutik appariartuaartinneqarnissaa siunnersuutigineqarpoq. 2008-mi tamatuma naligissavaa tunisassiorfinnut ataasiakkaanut ullormut 5.700 kr.-it missaannik tapiissuteqartarnissaaq.

Isumaqatigiissulli ataatsimiititaliamit akuersissutigineqassappat isumaqatigiissummi pissutsit arlallit allanngortinneqartariaqarmata ataatsimiititaliamit oqaatigineqassaaq.

1. 2008-mi aningaasanut inatsisissatut siunnersuutip aappasaaneerineqarnissaanut Aningaasaqarnermut Ataatsimiititaliap isumaliutissiissusiorneranut atatillugu AGF-ip tunisassiorfiini 2007-imi qaammatini arfinilinni siullerni tunineqartussat naatsorsuutigisat tunineqartullu pillugit takussutissiamik ataatsimiititaliaq pissarsivoq. Tamanna tunngavigalugu AGF-ip tunitsiviini ingerlatanut sanilliullugu pisortat kiffartuussinissamut isumaqatigiissutinut akiliutaat annertuallaarujussuartut ataatsimiititaliamit oqaatigineqarpoq. Minnerunngitsumik tunitsiviit arlallit tunitsivigineqanngitsuuissimanerat ataatsimiititaliap aalassaatigaa. Tunitsiviit killilerujussuarmik tunitsivigineqanngikkunik tunitsivigineqanngilluinnartartut annikitsuaraannarmillu suliffiusut ammatinnissaannut pisortat aningaasaataannik annertunerusunik atuinissaaq ataatsimiititaliap soorunami kissaatiginnilaa. Tapiissutit taamaattut najukkani inuiaqatigiinnut tapiissutaanngillat, tassaallutilli suliffeqarfimmu tapiissutit. Tamanna tunngavigalugu kiffartuussinissamik isumaqatigiissutikkut anguniarneqartumit inuussutissarsiuutigalugu piniartunut najukkanilu inuiaqatigiinnut annertunerusunik iluaqutaasunik tapiissuteqartoqartarnissaa ataatsimiititaliap kissaatigaa.

2. Tunisassiorfimmik imminut akilersinnaanngitsumik suliffiup ammatitsinermini aningaasartuutaasa Namminersornerullutillu Oqartussat tapiissutaasa akornanni ataqatigiittoqarnera uppersarsarneqarsinnaassasoq ataatsimiititaliamit kissaatigineqarpoq. Tamanna kiffartuussinissamik isumaqatigiissummi ilanngunneqassaaq.

3. Kiffartuussinissamik isumaqatigiissuteqarnermi pingaarnertut anguniarneqartoq allaqqassaaq ¿ tassa agguataarisarnermik nunap immikkoortuinilu naalakkersuinikkut anguniakkat, suliffeqarnermut, inuussutissarsiornermut allatigulluunniit anguniakkat pineqarpat?

4. AGF-imut akiliutitigut ingerlatseqatigiiffiup patajaassusiata qaffassarneqarnissaa siunertaanngitsoq allassimassaaq, akerlianilli tassaassallutik imm. 3-mi allassimasut naapertorlugit suliassanik aalajangersimasunik nassuiarluakkanillu ingerlatseqatigiiffiup isumaginninneranut akiliutit.

5. AGF-imut ataatsimoortumik taamatullu tunisassiorfinnut ataasiakkaanut tamanut missingersuutinik pissarsisinneqarnissani ataatsimiititaliap kissaatigaa. Taamaaliornikkut pisortat kiffartuussinissamik isumaqatigiissummut akiliutigisassaattut siunnersuutigineqartut aammalu tunisassiorfinnik ingerlatsinerup suliffeqarfimmu AGF-imut pisussaaffiliunneqartut akornanni ataqatigiittoqarneranik naliliinissaaq ataatsimiititaliamit kissaatigineqarpoq.

6. Kiffartuussinissamik isumaqatigiissutissatut siunnersuutip ilusiligaaneratigut sinneqartoorutaasinnaasunik ¿toqqorterinissamut¿ kiisalu tunitsiviit imminut akilersinnaasunngortinneqarnissaaq periarfissaqartinnagu sapinngisamik annertunerpaamik matoqqatinneqarnissaannut suliffeqarfik aningaasatigut kajumilersinneqarpoq. Taamatut pitsaanngitsumik kajumilersitsisinnaaneq naapertuutinngitsutut ataatsimiititaliamit isigineqarpoq. Tassunga taarsiullugu assersuutigalugu ingerlatassanut pisariillisaanissanullu minnerpaaffissatut piumasaaqatinik aalajangersimasunik suliffeqarfik

eqquutsitsingippat aningaasatigut naleqartitsinissamik isumaqatigiissut imaqartariaqarpoq.

7. Isumaqatigiissutip Namminersornerullutik Oqartussanit kommuninut tunniunneqarsinnaaneramik isumaqatigiissummi imm. 5.3-mi piumasaqaat ersernerluppoq. Taamaattoqartillugu Namminersornerullutik Oqartussanit tapiissutit kommuninut aamma tunniunneqassanersut qanorlu atugassaqaartitsilluni taama iliortoqassanersaq erseqqinnerusumik nassuiarneqassaaq.

8. Aningaasanut inatsimmi aningaasatigut sinaakkusiussat iluanni naatsorsuutitigut kisitsisinik *piviusunngortitsineq* naapertorlugu tapiissutinik tunniussisarneq atorlugu tapiissuteqariaatsimik allamik atuilersinnaanerup isumaqatigiissummi ilanngunneqarsinnaanera ajornanngippallu *piviusunngortinneqarsinnaanera* misissorneqassasoq kissaatigineqarpoq. Missingiusiaq saqqummiunneqartoq naapertorlugu tapiissutit aningaasanut inatsimmi aningaasaliunneqartut ilaattut taamaallaat tunniunneqartarput.

9. Namminersortoq nammineq akilerlugu najukkami tunitsivimmik tunisassiorfimmilluunniit isumaginninnissamik kissaateqarpat ukiumi tullermi siullermi 1. januar aallarnerfigalugu pisortat tunisassiorfimmu tapiissutaasa atorunnaartarnissaat immikkut piumasaqaatit ilanngunneqassaaq. Tamatumani pisortat najukkani unammilleqatigiinnerup equsoortinneqarneranut peqataanissaasa pinngitsoortinnissaa siunertarineqarluni.

10. Tunisassiorfinni imminut akilersinnaasumik ingerlatsinissap annertusarneqarnissaata anguniagaanissaa pillugu piumasaqaatinik aalajangersimasunik isumaqatigiissut imaqassaaq.

11. Isumaliutissiissummini siuliani taaneqartumi Aningaasaqarnermut Ataatsimiititaliap isumaqatigiilluni erseqqissarpaa *¿.. Kiffartussinissamillu isumaqatigiissutinut akiliutaasartut ukiut missingersuusiorfiit ingerlaneranni arriitsumik annikillisikkiartuaarneqarnissaat ataatsimiititaliamit*

utaqqiinnarneqarsinnaanngilaq.¿ Tamanna tunngavigalugu aningaasat 2008-mi aningaasanut inatsimmi immikkoortinneqartut kisiisa aallaavigalugit pisortat tapiissutissaat kiffartuussinissamik isumaqatigiissummi aalajangersarneqarnerat naammaginngilaq. Tassunga taarsiullugu suliffeqarfimmu tapiissutissat Inatsisartut ukiumoortumik aningaasanut inatsisikkut aalajangersartassagaat aammalu piffissap isumaqatigiissuteqarfiup ingerlanerani tapiissutit appariartortinneqarnissaat naatsorsuutigineqarsinnaasoq allassimassaaq.

12. Immikkoortumut siulianiittumut nangissutit isumaqatigiissutip atorunnaarsinneqarsinnaannginneranik imm. 5.1-imi piumasaqaat peerneqassaaq. Tassunga taarsiullugu tapiissutit appartikkiartuaarneqarnissaannik anguniakkap iluani AGF-ip angusatut piviusunngortitai nalunaarusiaalu tunngavigalugit isumaqatigiissut kiffartuussinissamullu isumaqatigiissummut akiliutit ukiumoortumik naliliiffigineqartarnissaannik piumasaqaat ilanngunneqassaaq. Tamanna missingersuusiornermut malittarisassamut 2002-meersumut ilanngussa 13-imi kaammattuutigineqartunut aamma naapertuunneruvoq. Tassani allassimavoq periusissamik ungasissumut isigisumik pilersarusiortoqarsimatillugu imaluunniit suliassat piffissami sivisuumi isumagineqarnissaat siunertaralugu annertuumik aningaasalersuisoqarsimatillugu ukiunut arlalinnut sivisussusilinnik aatsaat isumaqatigiissuteqartoqartariaqartoq. Pisumi matumani pineqartumi tunngavissaatitat taakku arlaannaalluunniit eqqortinneqarsimasorinangilaq.

13. Sullississutigisassatut piumasaqaataasut isumaqatigiissutigineqartut suliffeqarfimmit eqqortinneqanngippata kiffartuussinissamik isumaqatigiissummut akiliutit illuatungiusup kisimi aalajangigaanik ikilisinneqartarnissaat imm. 2.4-mi paatsuugassaannigsumik allaqqasariaqarpoq.

14. Paasissutissanik qinnutigineqartunik AGF-ip Namminersornerullutik Oqartussanut kinguarsaanertaqanngitsumik atugassiiarnissaa imm. 3.4-mi ilanngunneqassaaq.

15. Tunisassiorfiit suliassamik isumaginninnerannut atuisut kissaataattut paasineqartut kiffartuussinissamik isumaqatigiissutissatut missingiusiami qanoq ilanngunneqarsimanersut pillugit paasissutissanik pissarsisinneqarnissani ataatsimiititaliap kissaatigaa.

16. Kiffartuussinissamik isumaqatigiissutip ilaani kukkuneqarpoq, tassa qullerpaanngorlugit oqaasertaliunneqartuni allassimammatt piffissaq 2005-2007 pineqartoq.

17. Kiffartuussinissamik isumaqatigiissutikkut anguniakkat tapertaqartinneqarnissaat siunertaralugu aningaasat ingerlaarnerannik misissueqqissaarnermik ukiukkaartumik nalunaarutit imaqartarnissaat imm. 3.3-mi ilanngunneqassaaq, tak. suliiani allassimasut imm. 3 aamma 10.

18. Taaseqataasinnaanani aningaasarsiaqartinneqaranilu ilaasortassamut Namminersornerullutik Oqartussaneersumut AGF-ip siulersuisuini inissamik AGF-ip sullississutimi ilaatut atugassiiinissaa kiffartuussinissamik isumaqatigiissummut ilanngullugu piumasaqaatinngortinneqarnissaa

iluautissartaqassava? Aamma tak. aktiaateqarluni ingerlatseqatigiiffiit pillugit inatsimmi § 49, imm. 1.

19. Kiffartuussinissamut isumaqatigiissutip immikkoortumut 2008-mi aningaasanut inatsimmi immikkoortinneqartunit *annikinnerusumik* aningaasartallip aalajangersaavigineqarnissaa siunertaralugu kiffartuussinissami isumaqatigiissummi suliassat killilerneqarnissaat isumaliutigineqarsimanersoq paasissutissiissutigineqassasoq ataatsimiititaliap kissaatigaa.

20. Kiffartuussinissamik isumaqatigiissutip ilusilersorneqarnissaa pillugu AGF-imik isumaqatiginninniarnert pillugit nassuiaammik naatsumik pissarsisinneqarnissani ataatsimiititaliap kissaatigaa. Ukiumi aningaasanut inatsisip atuuffiani taamatullu ukiuni missingersuusiorfiusuni pisortat aningaasartuutaasa qaffasissusissaat sulariumannittussarsiuussisup tungaanit killilersimaarniarneqarsimanersoq nassuiaammi allassimassasoq kissaatigineqarpoq. Aammalu naalackersuinikkut isumaliutit pingaarnersiukkallu suut isumaqatigiinniarnerni tunngavigineqarsimanersut qulaajarneqassasoq kissaatigineqarpoq.

21. Agguataarisarnikkut anguniakkat, isumaqatigiissuteqarnermi pingaarnertut anguniagaasutut isigineqartariaqartut, kiffartuussinissaq pillugu AGF-imut isumaqatigiissutip ingerlaannartinneqarneranit allaanerusumik akikinnerusumillu qanoq aaqqiivigineqarsinnaanersut pillugu isumaliutigineqarsimasut pillugit paasissutissanik pissarsisinneqarnissani ataatsimiititaliap kissaatigaa.

Kiffartuussinissamik isumaqatigiissut inaarutaasoq Aningaasaqarnermut Ataatsimiititaliamit akuersissutigisaaq isumaqatigiissutigineqarsimatinnagu atsiorneqarsimatinnagulu AGF-imut aningaasanik siumoortumik tunniussisoqarsinnaanngimmat ataatsimiititaliap naggasiullugu Naalackersuisunut eqqaasitsissutigissavaa.

Aningaasaqarnermut Ataatsimiititaliap aalajangiinera

Apeqqutit siuliani taaneqartut Naalackersuisunit akissuteqarfigineqarnissaasa utaqqineqarnera kiisalu oqaaseqaatit siuliani allassimasut naapertorlugit kiffartuussinissaq pillugu isumaqatigiissutissatut missingiusiamik nutaamik nassiussinissaq siunertaralugit Naalackersuisut inassuteqaataannut isummernissani Aningaasaqarnermut Ataatsimiititaliap **kinguartippaa**.

Inussiarnersumik inuulluaqqusillunga

Augusta Salling

Aningaasaqarnermut Ataatsimiititaliap siulittaasua